

Plataforma Pais di Otmar Oduber no a keda registra pa participa den eleccion



Manera ya caba ta conoci, dia 6 di december binidero ta bay tuma luga eleccion parlamentario na Aruba. Esaki ta bin despues cu Gabinete Wever-Croes II a entrega su retiro prome

cu su termino a conclui. Esaki ta trece cune, manera inicio di campananan politico y anuncio di personanan cu lo subi lista di partidonan politico y/of anuncio di partidonan

nobo.

Pa algun tempo caba ex-minister y politico Otmar Oduber a duna di conoce cu e lo drenta e arena politico un biaha mas cu un plataforma nobo, esta Pais. Mirando e hechonan cu a sucede den e ultimo simannan, tur cos a adelanta y aworaki no tin seguridad si e politico lo ta participando den eleccion di dia 6 di december.

Segun e noticiero local, Noticia Cla a reporta, Oduber a confirma cu su plataforma nobo, Pais, no a logra keda inscribi pa e eleccionnan di e aña aki y pues e no lo ta participando den eleccion cu e plataforma aki.

Segun e noticiero a sigui indica, Oduber ta tuma un decision riba nivel personal y familiar. "Diaranson lo tene un reunion cu mi hendenan y participa esaki na nan pa nan

pensamento y diaranson mes lo participa esaki a comunidad," el a bisa na e portal. Oduber no a confirma si e lo subi lista di otro partido pa participa den eleccion.

Agun tempo atras rumornan tabata circula cu Sr. Oduber a ser acerca pa personanan cerca di partido MEP pa discuti traha hunto den e partido aki. Lider di MEP durante un conferencia di prensa a clarifica cu e no tin motibo ni intencion pa acerca señor Oduber tampoco pa papia cune.

"Mi no a papia cu Señor Otmar Oduber riba e tema aki, mi no tin motibo pa hacie y lo mi no hacie tampoco. Y absolutamente ningun hende den MEP tin mandato pa papia cu Otmar Oduber pa subi lista di MEP," e mandatario a

enfatisa.

Pa mas di cuater aña caba Oduber ta pendiente pa cera e pagina pa loke ta trata caso Flamingo, den cual e ta sospechoso principal. Despues di a bay varios biaha corte y sali cu denuncianan di abuso cometi den e caso aki, na comienso di augustus corte a informa Oduber cu e tratamiento di caso flamingo lo cuminsa dia 17 di november y ta spera cu pa dia 2 di december esaki lo yega su fin.

"Mi lo a prefera claro pa e caso cuminsa mas prome, pero despues di ta wardando mas cu cuatro aña caba, e tres luna aki mi ta kere lo pasa lihe y asina mi por defende mi mes di e acusacionnan sin base aki", asina Oduber a declara den e comunicado.

Marlon Croes ta retira di funcion como director di DOW

Ayera den un conferencia di prensa, a anuncia cu director di DOW, Marlon Croes a dicidi di retira for di su funcion despues di 35 aña den e departamento aki, na unda pa 20 aña e tabata fungi como director.

Tocante esaki, el a sigura na redactor di Bon Dia Aruba cu no tabata un decision lihe sino cu a tuma hopi aña. "Mi kier a bandona caba gobierno na 1994 pa mi bay traha na mi carera na Hulanda. E tempo ey mi director a convence mi

pa mi keda Aruba y a duna mi e proyectonan di Infraestructura mas grandi cu Aruba ta conoce, cu awor ta e Green Corridor y Watty Vos Boulevard, cu a tuma 25 aña di preparacion pa cumpra tereno, preparacion di destaho, busca financiamento y tur esey cu nos a logra cu e proyectonan akinan," el a bisa.

Pa su persona, e ta kere cu esey tabata un proposito cu su carera tabatin, cual el a logra di capitalisa cu ekipo di DOW. Apart, tabatin otro retonan cu nan a haci hunto

cu DOW, "pero e tabata un punto unda cu e ultimo aña of dos aña, mi tabata evalua kico mi ta bay haci cu mi carera. E tabatin un deseo pa bay den sector priva tambe pa haci otro cosnan, y "pa mi por siña di e sector priva. Pasobra ma siña hopi den DOW y sector publico, con pa traha cu gobierno, con pa deal cu parlamento, con bo ta deal cu minister, con bo ta haci proyectonan y esey tabata e reto grandi. Mi ta contento di por a haci tur eseynan y aworaki mi mester haci algo otro" el a bisa.

Tocante esaki, el a sigura cu el a combersa cu prome minister for di aña pasa caba y e aña aki atrobe el a trece esaki dilanti na april y na juli el a dicidi di entrega e carta di retiro. "Kiermen ta un periodo basta larga cu mi ta cana cu e ideanan aki y den e proceso aki mi a percura pa mi prepara e ekipo di DOW pa por deal den futuro."

Tocante e pregunta si tin algun persona den mente cu lo por reemplaza Croes den funcion como director, el a señala cu lo crea un comision pa despues anuncia ken lo ta e persona aki.

Partido Raiz ta desmenti salida di Geoffrey Wever

Despues cu algun medio di comunicacion local a circula e rumor cu actual minister demisionario di Asunto Economico, Comunicacion y Desaroyo Sostenible, Geoffrey Wever lo ta bandonando e partido pa uni cu Gerlien Croes den e partido nobo Futuro, Raiz a bin dilanti cu un "fact check" pa desmenti esaki.

Ta parce cu e rumornan a cuminsa pa motibo di un potret cu Gerlien Croes, kende diadomingo ultimo a lansa su partido nobo, Futuro, a post riba rednan social despues di apertura di Aña Parlamentario. Riba e potret por a mira Croes cu Wever, acompaña pa un frase celebrando nan amistad y relacion como colega den ambito politico di Aruba. Esaki a pone cu algun medio di comunicacion local a circula e rumor cu Wever lo bandona Raiz pa uni Futuro.

Sinembargo, partido Raiz a post riba nan pagina di Facebook un fact check, bisando: "Liderazgo di Raiz y Geoffrey Wever ta desmenti e rumor aki. Informacion oficial di candidatonan ta wordo comunica door di partido."

Ademas, Bon Dia Aruba a tuma contacto cu lider di Raiz, Ursell Arends, kende tambe a desmenti e rumor.

